



## Chumoukedima nung CEO-i strong rooms & counting hall asadang



**Dimapur, Monupii/May 6 (TYO):** Chief Electoral officer Nagaland, Kohima, Vyasam R, IAS-i May 4 nü Chumoukedima sendanga Chumoukedima DC indang Office nung strong rooms aser counting hall asadangogo. Chief Electoral officer-i strong rooms aser counting hall ya Deputy Commissioner, Chumoukedima, Abhinav Shivam, IAS aser ken o dak sendakba aliba ketdangsurtem matsüngdang asadanga liasü.

## Manipur nung school & college tem anogo ana atema shibangtsüogo

**Imphal, Monupii/May 6 (Agencies):** Manipur nung tsüingsang mopung kanga majungba ajanga May 7 tashi anogo ana school aser college tem ajak shibanga atatsü asoshi state sorkari Deobarnü metetdaktüsügo. Manipur Chief Minister N Biren Singh-i X sabang ajanga, "state nung tsüingsang mopung kanga majungba ajanga school aser college tem ajak May 6 aser 7 nü shibanga atatsü," ta metetdaktüsü. "Tsüingsang mopung kanga majungba ajanga lendong tsüingsang mopung kanga ajangshitsü ana nung aliba temulungdang yur kümdangshia alitsü atema iba telemtetba agiogo. Ni nisung ajak dang ken o angadanga atatsü aser kilong nung kümzüka alitsü mepeshir. State sorkari timtem ajak kongshir alirtem taküm, kiojen aser alirongsen balala kümzüka toktsütsü atema takokba tashi jenjang agidar," ta CM-i shisem. State nung Deobarnü tzünglu kanga sashia aruba den rür tsükba sülen state chief minister-i kanga kara jenjang agiogo. Deobarnü tsüingsang mopung kanga majungba ajanga tesem aika nung teraksatsüba aika adokogo. State kübok aser talisa Imphal Valley districts nung school tem aika nung GI tin kilem rür agi onsatsüogo aser rür agi ki raksatsür alirtem noklang aika school kitem nung khen atema jenoka lir. Deobarnü 1:30 ako shi nung rür ya minute 15 shi tsük aser iba ajanga teraksatsüba aika adokdaktüsügo aser nisung noklang aika talidak ki maka kümogo.

## Assam nung election atema noboyimba ya temeshi aini aor mesüka liasü: CM Sarma

**Guwahati, Monupii/May 6 (Agencies):** Assam chief minister Himanta Biswa Sarma, shibai Assam nung nüboyimba sentong Deobarnü tembangogo, pai iba tajangshiba ya temeshi aini aoba mesüka liasü ta ashi. Anogo 40 tsüingda CM Sarma-i Assam kübok tesem balala sema senzü aser iba mapang lokti senden aser road show 117 nung shilem agia liasü.



Himanta Biswa Sarma

Lok Sabha elections atema Bharatiya Janata Party (BJP) candidate tem asoshi nüboyimba indang jembiba mapang Assam CM Himanta Biswa Sarma-i iba sentong ya temeshi aine aoba mesüka liasü ta ashi. "Assam nung ni nüboyimba sentong ya temeshi aini aoba mesüka liasü. Taoba anogo 40 tsüingda ni state ajunga ayimjemogo aser lokti senden aser road show 117 nung shilem agiogo. Iba ya Ganga ayong nung temeshi tzü chikoba ka mesüka liasü," ta CM-i ashi.

Sarma-isa, Assam nung alirtemi pa nem temaotsü balala agütsüba atema kanga pelaba lemsatsep aser ashiba agi iba ajanga pa kanga asüingsashiogo. Assam nung election atema nüboyimba sentong May 5 nü tembangba mapang Sarma-i Assam nung atema maneni bendanga agütsüshiba lemsatsep, aser pa taküm nung mapang ajak nüburtem terenlok aser yimjiyimjug atema bendanga agütsütsü ta nangzüka liasü.

## DAO Longleng den tepila sentong agi



**Dimapur, Monupii/May 6 (TYO):** DAO Longleng, S. Yongchang Phom den tipila sentong ka May 4 nü DAO office Longleng nung agiogo. Iba sentong nung o jembiba mapang DAO mapa toktsüsang S. Yongchang Phom-i, pa den teka amtepa inyakba aser pa nongita yariba atema staff ajak dang kanga pelaba lemsatsep. Paisa, parnok dang aluyimba lokti

ajungkettsü atema maneni meranga inyaktsü ajungshia liasü. Maneni pai, aluyimba ya meimchir taküm liyonga aotsü atema ajak dang tongtibangtiba lir ta ashi aser sentepa aliba lokti dang mapa jetjeta inyaktsü aser aluyimertem nongita yaritsü ajungshia liasü. Iba sentong ya A.O Longleng M. Chingsang Phom lenisüba nung agia liasü.

## State Election Commissioner-i 'Revising Authorities' ... (TAPAK 1 NUNGI...)

Pei district nung 'Revising Authorities' tenüngtem yamai alitsü:

SL. NO.	NAME OF OFFICER	DESIGNATED AS	DISTRICT	MUNICIPAL/TOWN COUNCIL
1	Shri. Kumar Ramnikant, IAS Deputy Commissioner	Revising Authority	Kohima	1. Kohima Municipal Council 2. Chiephobozou Town Council
2	Shri. Rohit Singh, IAS Deputy Commissioner	Revising Authority	Tseminyu	1. Tseminyu Town Council
3	Dr. Tinojongshi Chang, NCS Deputy Commissioner	Revising Authority	Dimapur	1. Dimapur Municipal Council 2. East Dimapur Town Council
4	Shri. Abhinav Shivam, IAS Deputy Commissioner	Revising Authority	Chumoukedima	1. Chumoukedima Town Council 2. Medziphema Town Council
5	Shri. Thsuvisie Phoji, NCS Deputy Commissioner	Revising Authority	Mokokchung	1. Mokokchung Municipal Council 2. Tuli Town Council 3. Changtongya Town Council 4. Mangkolemba Town Council
6	Shri. Vineet Kumar, IAS Deputy Commissioner	Revising Authority	Peren	1. Peren Town Council 2. Jalukie Town Council 3. Tening Town Council
7	Shri. Ajit Kumar Ranjan, IAS Deputy Commissioner	Revising Authority	Wokha	1. Wokha Town Council 2. Bhandari Town Council
8	Shri. Rahul Banudas Mali, IAS Deputy Commissioner	Revising Authority	Zunheboto	1. Zunheboto Town Council 2. Satakha Town Council 3. Atoizu Town Council 4. Aghunato Town Council
9	Shri. Dharam Raj, IAS Deputy Commissioner	Revising Authority	Longleng	1. Longleng Town Council 2. Tamlu Town Council
10	Shri. Ajit Kumar Verma, IAS Deputy Commissioner	Revising Authority	Mon	1. Mon Town Council 2. Naginimora Town Council 3. Aboi Town Council 4. Tizit Town Council 5. Tobu Town Council
11	Shri. A. Zibenthung Kithan, NCS Deputy Commissioner	Revising Authority	Tuensang	1. Tuensang Town Council 2. Longkhim Town Council
12	Shri. Temsuwati Longkumer, NCS Deputy Commissioner	Revising Authority	Kiphire	1. Kiphire Town Council 2. Seyochung Town Council 3. Pungro Town Council
13	Shri. John Tsulisie Sangtam, NCS Deputy Commissioner	Revising Authority	Phek	1. Phek Town Council 2. Pfutsero Town Council 3. Meluri Town Council 4. Chozuba Town Council
14	Smt. Sara S. Jamir, NCS Deputy Commissioner	Revising Authority	Niuland	1. Niuland Town Council
15	Shri. Y. Chingyak Konyak, NCS Deputy Commissioner	Revising Authority	Shamator	1. Shamator Town Council
16	Shri. Arikumba, NCS Deputy Commissioner	Revising Authority	Noklak	1. Noklak Town Council

## AR-i Mokokchung nung Meru Life Initiative sentong amenokogo

**Dimapur, Monupii/May 6 (Agencies):** Assam Rifles-i Rifles-isa, Mon district kübok Sheanghah Wamsa nung May 6 nü Meru Life Initiative programme amenokogo. Sentong agiba mapang sepaitemi India sorkari amenokba LiFE - Life For Environment initiative ya alirongsen tebilemdangba kecha makai raksa amshitsü melena kanga bilemdanga kümdanga amshitsü aser tzü mopung kümzüka aser wazüka ayutsü atema mass movement ka ama tenzüko, ta ashi.

Kasa mapang nung Assam Rifles-isa, Mon district kübok Sheanghah Wamsa nung May 6 nü Medical Camp ka ayongzüka agiogo. Medical camp ajanga temeket nung aliba yimtsüngtem nungi densema tebur 34, tetsür 43 aser tanur 85 ta ajak senteper nisung 162 ajangzüko.

Sentong nung Assam Rifles sepaitem aser parnok kibongtemi tzü mopung kümzüka ayutsü atema tenangzükepba agiba sentong ka agia liasü.

Maneni AR-i, libaliro tajung benshitsü aser General Medicine dak sendakba nung nüburtem nem tangazükba agüja liasü. Assam Rifles-i kinük nung aliba tesem ka nung iba amala medical camp tajung ayongzüka katsüba atema nüburtemi parnok dang kanga pelaba lemsatapa liasü.

# Tanü states aser UTs 11 nung Lok Sabha menden 94 atema election agir

**New Delhi, Monupii/May 06 (Agencies):** Mongolbarnü Lok Sabha election shilem tasembuba nung states aser union territories 11 kübok Lok Sabha menden 94 atema election agitsü.

2019 küm Lok Sabha election nung item menden 94 nungi BJP-i menden teimbaka nung takok ngua liasü, talisa Gujarat, Karnataka, Bihar aser Madhya Pradesh state tem nungbo parnoki menden ajak nung takok ngua liasü.

Lok Sabha election shilem tasembuba nung vote agütsütsü temsüa alir crore 11 dak tema lir. Menden 94 atema tetsür candidate 120 densema candidate ajak agi 1,300 dak tema lir.

Tongtibang candidates rongnung Union ministers- Amit Shah (Gandhinagar menden), Jyotiraditya Scindia (Guna), Mansukh Mandaviya (Porbandar), Parshottam Rupala (Rajkot), Pralhad Joshi (Dharwad) aser SP Singh Baghel (Agra) nunger densema lir.

Surat nungbo BJP candidate den tetokteper melii shimogo.

Mongolbarnü Ato kilonser

Narendra Modi'er state Gujarat nunga menden 25 atema election agitsü, Maharashtra nung menden 11, Uttar Pradesh nung menden 10 aser Karnataka nung menden 14 atema election agitsü.

Iba dak alia Chhattisgarh, Bihar, Assam, West Bengal, Goa aser Union Territory of Dadra & Nagar Haveli and Daman & Diu nunga election agitsü.

Mongolbarnü Ato kilonser Modi aser Union Home Minister, Amit Shah nati Gujarat nung vote agütsütsü. Taoba mapang Madhya Pradesh nung chief minister inyaker ana-Shivraj Singh Chouhan (Vidisha) aser Digvijaya Singh (Rajgarh) natia Lok Sabha election nung tokteper.

Maharashtra kübok Baramati menden nung Sharad Pawar'er jala Supriya Sule aser Maharashtra deputy Chief minister, Ajit Pawar kinüngtsü, Sunetra Pawar na tsüngda tokteptsü.

Election shilem tasembuba nung tebur voters 1,07,64,741, tetsür voters 1,02,26,946 aser third gender voters 929 lir, ta election ketdangsertemi

metetdaksü.

Uttar Pradesh nung Samajwadi Party tongti lenir, Akhilesh Yadav kinüngtsü, Dimple Yadav-i Mainpuri Lok Sabha menden nungisa tokteptsü. Akhilesh Yadav tebu Mulayam Singh Yadav süadokba agi Mainpuri menden azüngteta liasü aser iba menden atema by election nung Dimple Yadav-i takok ngua liasü.

May 7 nü taoba mapang Karnataka chief minister Basavaraj Bommai-i Haveri menden aser AIUDF lenir Badruddin Ajmal-i Dhumbri menden nungi tokteptsü.

Election atema nüboyimdang BJP-i aniba NDA aser opposition INDIA teloktep na tsüngda talisa reservations onük aser JD(S) lenir, Prajwal Revanna-i tetsürtem dak tim mesüi benshiba ken o nung tai tongloksütepa aruogo.

Lok Sabha election shilem tasembuba tashi nung menden 283 atema election agir asütsü aser tanüngba menden 260 atema May 13, May 20, May 25 aser June 1 anogotem nung election agiba sülen June 4 nü vote azüngtsü.

## Mulungnen



"Ni rara tajungji raraogo, ni alizüng tonga asemogo, ni tamangji yuogo" 2 Timoti 4:7.

Onoki teti meima aliba tsürabur **Asür I. Nükshi Imsong** Kangtsüng (Retd. Teacher) mapang tatsüka shirang yipten nung yaroteper kodanga meshilangtsüba limai anogo - 30th April 2024 nung asen Kibubai jar ogo. Tongtipangsa Kangtsüng Baptist Arogo aser Kangtsüng Reongsanger Putu yimsürtem ano tesem balala nungi aria bilemba temulungjang bener ozü asüko anogo nung shimokisa nübo, rongsen, mapang aser sarasadem nung yariogo nenok ajak dang kinunger tenüng nung kanga pelaba lemsateper. Nenok mapa tajung asoshi asen teyanglur Tsüngremi temoatsü agüjang ta ozü tamang sarasadem.

~ Kinungtsü, Chirnurtem aser Semchirtem.

## EC-i party tem dang nüboyimdang AI tim mesüi mamshitsü metetdaksü

**New Delhi, May 06 (Agencies):** Hombarnü Election Commission (EC)-i yimtenren party tem dang election atema nüboyimba mapang nung taila noksa/video yanglutsü atema AI (Artificial Intelligence) tim masüba nung mamshitsüla, ta tuyuogo.


Election Commission-i party tem dang item ama noksa/video ji ghonda 3 tsüngda agienadoktsüla aser tangar jashidaktsütsüsa tiyazü osang meproksüla, ta metetdaksü.

Election Commission-i, "Election nüboyimba mapang yimtenren party tem aser parnok züngsemtemi social media amshidang Model Code of Conduct aser ozüing alema inyakbatem jangjaba nung ajemdaker tanü Commission-i yimtenren party tem dang

election nüboyimba mapang nung social media timi mamshitsü tuyur," ta metetdaksü.

Commission-isa yimtenren party tem dang osang tai proktsü atema AI tim mesüi mamshitsüla aser election akhümket wazüka ayutsüla, ta metetdaksü.

Election Commission-isa yimtenren party tem dang, "Item ama taila noksa/video ji ghonda 3 tsüngda agienadoktsüla, party nung yamaji inyakerkem dang tekümdangtsü metetdaksütsüla, osang tai prokba metetra Information Technology (Intermediary Guidelines and Digital Media Ethics Code) Rules, 2021 nung Rule 3A kübok Grievance Appellate Committee nem item amaji osangji metetdakjang," ta tuyuogo.



May 06, 2024 nü New York nung Panchayati Raj nung tetsür lenirtem- Tripura nungi Supriya Das Datta, Andhra Pradesh nungi Kunuku Hema Kumari aser Rajasthan nungi Neeru Yadav nungeri Permanent Representative of India to the United Nations, Ruchira Kamboj ajurudang tangokba noksa nung angur.

## Tetsü kati jabaso ka ayong nung ajungoktsü sülen tsürangi nguset

**Bengaluru, May 06 (Agencies):** Karnataka nung tanur tetsü kati arrshi küm trok lar jabaso ka ayong nung puoktsüba sülen tanurji tsürangi nguset.

Honibar aonung Uttara Kannada district kübok Halamadi yimdak kinüngbu tena raratepba sülen lai tanurji tsürang aliba ayong ka nung

puoktsü; Amongnü anepdang ang tanur tasü mangji zübo aika keter tasü angu. Arrshi küm 36 tetsü, Savitri ji puogo aser la anema nisung tepsetba ken o benokogo. Tanurji tera matamabensa liasü.

Osangbenertem den jembidang Savita-i, "Tanur asübaji kü kinüngbu (Ravi

Kumar) tai ajanga lir. Pai jabaso (Vinod) südakjang ta jembia aru. Kü kinüngbui yamaji dang benshi aru, anungji ozü jabaso koba tashi arenzüktettsü? Pai kü dang tanurji südakjang ta jembia aru," ta ashi.

Savitri aser Ravi Kumar na court matsüngdangi anir ao aser tang judicial ket nung lir.



Chhindwara (Madhya Pradesh), May 06, 2024: IAF sepaitemi Jammu & Kashmir kübok Poonch district nung kiralongrartemi amakba mapang khasetba sepai, Vicky Pahade tasü mang Chhindwara tonga bener arudang tangokba noksa nung angur.

## Indian Navy nung Agniveer SSR-sepai shimtsü

**New Delhi, May 06 (Agencies):** Indian Navy nung tenzüksü janrar lanurtem atema Agniveer SSR aser MR menden nung shimoktsü osang sangdongogo.

Tejangrartemi May 13 nungi tenzüka online ajanga application agütsütsü akok. Temsüa alirtemi official website Join Indiannavy.gov.in ajanga application agütsütettsü aser iba website nung sepai nung shimokba inyakyim tejangja angutsü.

Online ajanga application May 13 nungi tenzüksü aser May 27 tashi asütsü.

Temsüa aliba tazüngba telatet; Indian Navy Agniveer SSR-MR Recruitment 2024 atema tejangrar candidate temji recognize asüba school education board ka nungi class 10 nung tajemba agia 50% percentage nung takok angur ka asütsüla.

Candidate temji November 1, 2003 nungi April 30, 2007 tashi nung asortem asütsüla.

Application Fee ji Indian Navy Agniveer SSR-MR Recruitment 2024 kübok category ajak atema sen 550 asütsü aser ibaji tanaben meyipa magütsütsü.

Tatidang agiba yimya: Indian

Navy Agniveer SSR-MR Recruitment 2024 exam ji computer-based format nung agitsü. Paper nungji tasüngdangba 100 alitsü aser tasüngdangba shiaji mark kaka asütsü. Tasüngdangbatemji telemsa (section) pezü- English, Science, Maths aser General Awareness subject tem nungi alitsü. Tatidang agiba mapangji ghonda 1 asütsü aser telemsa section shia nung minimum pass marks ji Indian Navy-i lemtettsü.

Application Inyakyim: Tamasa official website Indiannavy.gov.in join reprangang; Homepage nung aliba "Register" tab nung 'click' süang; Nü Aadhaar number aser mobile number amshia registration agiang; Nü account tejangja nungi log in asüba sülen application form fill-up süang; Nüngdakba documents ajak upload asütsüla; application fee agüjang aser tatemsa na atema-a nai agütsüba application ji copy ka download süang.

Indian Navy Recruitment 2024 kübok shimba sepaitemji küm 4 atema asütsü, itasen Rs. 30,000 asütsü aser küm shia fixed increment tutsütsü.



## TIR YIMYIM YIMOBILEM (EDITORIAL)

DIMAPUR SANGTENNÜ, MAY (MONUPII) 07, 2024

### Sobaliba anogo

**A**tangji, anogo shia ya asenok asoshi sobaliba anogo lir, kechiyong alima nung nisung ka taküm ali tepiyong anogo shia inyaka aoba mapatem ajakji sobaliba lir. Ajisüaka, item sobalibatemi jangjatsü atema Moatsü aser Tsüngremmung mapang ama nung amognü ka agiteta Diphupar Ao Baptist Arogo nung küm shia amungba ya junger aser itemji ajaki ajizüka amung nungbo asenok arogo, loktiliba aser yimten kanga junga akümtsü. Asenoki aiben sobaliba indang jembitsü asüdüng jet ta asen mulungjangi akhi limapur libaliru yimyattem indang arur aser item akhi sobalibatemi ajunga tamjung amai dang bilemer. Ajisüaka, tanü asenok mezübelang sobalibatem dang nungibo akhi tsürabur temerük aser tebetet sobalibatema tajungba liasü. Asenok ya tetsü tebou nungi Tsüngrem dak amanga aruba tamanger kin, anungji asenoki ali yanglusang tsüngremji Lijaba ta amanga külem aser obendangsang tsüngremji Meyutsüngba ta, ali aser anung temoatsü aser lendong timtem agütsür tsüngremji Lungkitsüngba aser Anungtsüngba ta külema aru. Tanü asenoki amangba tangatetba aser jenjang den kodang akhi tsüraburtemi külemba tsüngremtem aser yimyattem medemdangdir, otsüla oboula nungertemi tanü asenoki amangba Yihovah Tsüngrem aser Yisu Khrista indang mangashi aser memetetba agi dang ashi, mapa ajak Tsüngrem dang dang asüngdang inyak aser temang dena merükteta anemponga Tsüngrem tsübua aru. Aji oda, Lijaba agi Yihovah Tsüngrem aser Meyutsüngba, Lungkitsüngba aser Anungtsüngba ta tetshia külema aruba agi Yisu Khrista ta tenüng dang melen ashi, asenok ya tsürabur mapang nungi Tsüngrem metetba kin ka liasü. Kasaji, asenok tsüraburtemi Yihovah Tsüngremi Par ajaso chir Yisu Khrista alimai yoka asenok kodanga masütsü aser mesamatsüsa kümzük ta memetet dangbo süng aser lung külem saka tangbo asenoki süng aser lung yanglusang kibur Tsüngrem külemer. Aji oda, teyanglubatem masü saka teyanglusang külemtsüla ta nüchi shisatsü asenok nem agütsübaji Yisu Khrista temeim osang ajanga lir. Itemji kodang asenoki jungjunga shisadangdir, asenok ya sobaliba tajung nung kati ka akümtsübutepa, kati ka dang tenüngateta mejai yaritepa aruba kin lir. Kar kibong nung danga alu mapa meinyaktetsüsa shilumanem agi tongra kinunger adianu, kidang kiyonger aser yimtsür-yimertemi peisasa apiteta pei chitem bener nija ayongtepa par luji inyaktsü. Ibaji asen sobaliba liasü. Ano, asen sobaliba tajung aser temerük kaji tenük dang ajung asaa kin kidong mashishitepi kibalembu masü. Kari danga pei kin aser kidong den medemra, iba mapaji putiri atakatema ak tesü ka asadakja bener yimdong süa jaja aser tenaji kibong kümra, yim mazüyatsü aser mazükmaru matentsü atema yimtak nungi aridok aser par chirnurtema lokti aser yimten nung mamshi. Item sobalibatemi tajungba aser takangba meyteta amshitsü atema tanü putu nung arogotemi sobaliba anogo ayongzüka tantsü tambu aser lanurtem nem shilem agidaktsüba agi asenok lokti, yimten aser arogo tali temeshitetba, teindangba aser tebetetba aotsü. Asenoki tsüraburtem limapur aliba mapangbo Tsüngrem memetet mashimashi ali ama bilemer, ajisüaka tanü asenok libaliru reprangdangra asenokang Tsüngrema mali ama asenok libaliru nung kanga memerük aser meindang alir. Aji oda, au senchi liasü saka tanübo asenok rongnung shiba dang au senchi chir shiba dang machitsü, Laishiba amer dena asenoki matidaki auyar. Kibalembu nunga mashi arogo ka nung tedi tenna kibong kümtsür, anungji kin kidong tenüng melena tebu tenüng dang amshir. Itemji tanü putu nung Khristan sobaliba mangatetba agi lir. Iba jagi asenok mazükmaru adener. Sobaliba ya Israel nunger nembu Mosa ajanga ozüng kümer agütsü saka asenok nembu Yisu Khrista taochi ajanga asenok sobalibasa süaka tajungba küma benschitsüsa osang tajung kümer agütsü. Anungji, kodang asenoki alima nung asen sobaliba junga benschitetdir, kotak nunga asenoksa tepelaba aser nümatedangtetba alitsü amai bilemer.

## OLEMSABANG

### Tanü asen Naga nunger nuburtem kukua asükdemer

~ L. Kika Pongener.

*(Yashi adok nungi...)*

Tip külen tema sorkar nung reprangdangra, tenung agibo 'Democracy' yayim agi yimsu asüba lima, saka jungjunga shisadangra, shitakba (Reality) nungbo 'Dictorship' yimsüsüba lima ka dang mesuka kümogo, Party ka aser nisung ka mulongba nung yimsu asüba lima ka mesuka kümogo. Opposition mali Boss-bai kechi shidir soldier ajungai hau hai ta anidakba lima ka kümogo. Assembly nung ken o atsütepa aser ashishitepa jembiba kangabo mangur, oda Boss-bai kechi renema bener arua zünga shidir aji teka mekhanga agizüker Assembly tembanger. Election agiba shia nujiso tatempang telemtetba agitsüba 'Manifesto' agi nuburtem mesuzüktsü, saka Election temerbo nangzükba ama meinyaker. Nujiso ken o telemtetba (Solution) tetsükdaktsü makai agitsü nungdem nung 'Opposition-less Govt.' anaben tashi yangluogo...Saka tanü tashi nung nujiso indang kecha tsüngsu-mong maka...!!! Anungji iba ya nubur mesuzüktsüba oyim-osu tajung (White-wash) jembir dang ashi, shitakba-bo pei yangkü asüngtsü bushiba danga ta nuburtem-ibo bilemer. Tawa agiba Lok Sabha Election nunga yimsüsür aikati asen tamangba aser ayak kümzüka ayutsü indang Election nubuyimba lokti-senden ajak nung jembio. Yimsüsür karibo Vote angutsü mechi nung asen Naga nunger akhi tejen otsü-a pei aginulen asa-a meyipshia jembiba-a nguogo.

Ajisuaka, item küsa yimsüsür-i tanü India lima nung Khristan-tem dak amokmerenba, reshikangshiba, tenlaki amakba otsü-osang ngua-aka/angashi-aka iba anema ola kata madoker. Asen Kidanger Manipur nung Khristan-tem tenlaki raksaja reshikangshiba angashi-aka asen yimsüsür-i tim o ka danga shidangba mangur. Assam nung Khristan-tem anema inyakba ngua-aka/angashi-aka tim o ka danga shidangba mangur. Ashiko, küsa Center sorkar nung 'Rulling Party' den sentaktepa aliba agi ola kata madoki toktsür sudi ta bilemer. Atangji, India lima nung Khristan-tem aser kin tilatem reshikangshiba angashi-aka/ngua-aka asen sorkar-i mangashi/mangu amai ola madoki toktsüba ngua nuburtem kanga sungmanger...!!! Surabangla, Election nubuyimba mapang tamangba yimsu kümzüka ayutsü ta jembibaji...Koba amala yimsu ka kümzüka ayutsüba indang jembir...??? ta nuburtem sungmanger...!!! Ashiko, Center sorkar-i Deobar anogo ajak nung Office lapoka mapa inyakang ta ashi nunga, asen sorkar-ibo...Mon District Tapi Constituency Bye Election nung Deobar-nu vote azüngba ama-to tashi anga-a anidaktsü sudi ta bilemer. Ano asenok nuburtema...Tang Lok Sabha Election nung asen Minister-ba, Advisor-ba, MLA-ba menden tajung (Position) atadaktsünudang...Yimtsüng kar nungpo yimsüsür-i tongti shilem agia vote enoktsüba aser arogo nung toklang tenzüker-ia dena yimsüsür-i ashiba nung ola madoki tashi anga-a anidakba ama-to anidaktsü sudi ta bilemer.

Jokorla, tang Naga nunger nubur ajunga taginubaji...Asen lima nung temelen saru saruba, pua bener orr amokmerenba, sen aika khanga meshiba, yamala nungi kümzüktsü atema telok-tentet (Faction) ka tenzük nungang, iba telok jagi temelen (Tax) saru saruba, pua bener orr amokmerenba, iba ama tia nungi kümzüktsü ta shisadanger. Shishilepartem dang temelen (Tax) saru tali saruba agi osettsüset nung jenjang tujen atur, aser idangji sensaker aser tilartem balaka sensak tia lujen-alur. Contractor & Supplier-tem tang percentage (%) meshiba agi terenlok mapa shitak/junga meinyakteter. Aji oda, nuburtem iba amaji asükdema timtem-aka, sorkar-i ibaji mangu/mangashi amai züba-züba atoktsür. Temelen saruji Naga nunger lisopur dangbo memeshitsü, tsümar (Non-local) dangang meshitsü ta suaka, temelen (Tax) saru meshiba ajakji osettsüset jenjang dak keter meshir asünung, nuburtem timtemjibo küsa dang asütsü. Anungji tanü asen lima nung Tax Collection, Extortion, Kidnapping, Treated yamala nungi nujiso angutsü atema telok-tentet ka tenung jateta tenzüktsü kanga-sa rongdaka kümogo ta nuburtemi shisadanger.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Nicaragua linük nung pastor tem aika pua ayuba atema aitsür



Nicaragua linük nung Puerta de la Montaña organization kübok inyaker pastor tem.

**May 06, 2024:** ADF International-i mepishiba nung ajemdaker Inter-American Commission on Human Rights-i Nicaragua sorkar dang parnoki pua aliba pastor 11 health anepalutsüsü, akhümtsübutüsü aser kümzüka ayutsü mepishia metetdaksüogo.

Nicaragua linük nung pastor aser ministry nung inyakterem aika pua küm 12 nungi küm 15 tashi tepuokdak ayutsü obendang agütsüba aser pastor tem shia dang senchi million 80 achiba osang ADF International teloki sangdongba ajanga alimai iba osang meteta aküm.

ADF International legal counsel, Kristina Hjelkrem-i Inter-American Commission on Human Rights-i kanga kera telemtetba agia inyakba atema pelaba metetdaksü.

ADF International-i Inter-American Commission on Human Rights aser meimchir temeden atema inyakterem dang Nicaragua nung pastor tem apuba ken o nung pastor tem yaridaktsüner, ta tamalen mepishia liasü.

"Tamangba yimsü nung ajemdaker nisung shinga tepuokdak mayutsüla mesüra temerenshi magütsüsüla, ajisüaka yimsü lenirtem anema yamaji inyakogo. Nicaragua nung ketdangsertemi meimchir temeden akhümtsübutüsü aser item pastor tem tepuokdak nungi chiochtsü onoki imlar," ta parnoki metetdaksü.

Yaküm December ita nung Nicaragua police-i Puerta de la Montaña organization-i senotsü ochimeshii amshir, ta tai tonglokja nisung asem tama pua liasü.

Iba organization ya US nung amenoka aliba Mountain Gateway ministry kübok organization ka lir. Montaña organization-i Nicaragua tesem balala nung evangelical sentong aika ayongzüka agidang nisung million 1 jungnüa adenba aser aikati Yisu Khrista agizükba sülen nungi ketdangsertemi iba telok nung züngsemtem anema mita ao.

Pastor tem anema ken o jembia arur taküm March ita nung court-i parnok aitsü aser April ita tetenzüklen parnok küm

12 nungi küm 15 tashi tepuokdak ayutsü obendang agüja liasü.

Taküm January ita nung Mountain Gateway-i, Nicaragua pastor tem anema ken o jembirtemi mission telok nung züngsemtem America nunger asem- Jon Britton Hancock, Jacob Britton Hancock aser Cassandra Mae Hancock nunger den Nicaragua nunger asem- Walner Omier Blandón Ochoa aser Maricela de Fátima Mejía Ruiz nunger anema jembia liasü.

Iba mapang nungji Mountain Gateway-i, "Nicaragua sorkari pastor temi aibelena mali ta shiaka parnok ita ka dak tali pua liasü. Iba sülen sorkari Mountain Gateway nungi Nicaragua nunger pastor tem dang lawyer ka mela," ta metetdaksü.

Mountain Gateway-ibo parnoki US aser Nicaragua naprongla nung temzüng kübok shidak inyaker ta ashiba den külemi bendanglen nungi fund agizüktsü atema Nicaragua sorkaria temelaba agüja liasü aser senotsü ajakji shidak dang amshio, ta ashir.

Open Doors teloki ashiba agi, 2018 küm nüburtemi sorkar anema longkak aitba mapang nungi tenzüka Nicaragua nung Khristantem aser lenirtem anema inyaker. Sorkari Khristan lenirtem aika puogo, Khristan kiojentem soita ayu aser Khristan schools den TV stations aser charities aika anentsüogo.

US Senators- Rick Scott, Ted Cruz, Katie Britt aser Tommy Tuberville nungeria Nicaragua nung pua aliba pastor tem pusema jembiba den külemi Biden administration dang Nicaragua anema inyaksüla, ta takhangba agütsüogo.

Ketdangsertem jagi Protestant pastor tem jagi senotsü tsütsü ochimashi inyakogo ta tai tongloktsür, ajisüaka sorkari pastor tem anema kuli magütsüteter.

Iba linük nung sorkari Evangelical telok ya samatsüsü meranger, ta Mountain Gateway Order ministry nung tongti, Britt Hancock-i metetdaksüogo.

Interview ka nung

jembidang Hancock-i, "Nicaragua nung register süa aliba ministry indang registration agienogo aser onok meyong kiojen ajak puogo. Parnoki onok indang bank accounts-a anentsüogo. Nicaragua nung Mountain Gateway organization anenogo. Ajisüaka Tsüngrem yimli atema inyakba mapabo metembanger, aser tanela mapa maneni inyaksü. Ajisüaka joko iba linük nungji onoki organization ka amabo meinyaktetsü," ta shiogo.

Pastor 11 anema obendang agütsüba dak alia missionary asem- Hancock den pa kinüngtsü aser jabaso nunger anema-a Interpol kübok 'red notice' agütsü, anungji parnoki Mexico nung tetsüng ajemokra parnok aputsüa akok.

Latin American linüktemia par asem aputsü aser parnok pura parnok asemprongla Nicaragua-i yoktsü, ta sangdongogo.

Nicaragua nung Tir, Daniel Ortega-i aniba sorkari, 2018 küm nüburtemi longkak aitba aser Tir menden nungi pa atsüngdoktsü merangba maparen nung Khristan putirtemia shilem agiogo, ta tai tonglokja linük nung Arogo anema inyaker.

# Gaza nung Khristantem meshimeshia samatsüsa tensa ka nung lir

**May 06, 2024:** Tang rara aliba Gaza Strip nung Khristantem meshimeshia samatsüsa tensa ka nung lir; tawa Khristan kibong aikati Gaza toktsür Egypt ajanga alima tesem balalai ogo, ta International Christian Concern (ICC)-i metetdaksü.

Israel aser Gaza na tsüngda rara tenzüka sülen nisung meyirjang aika süogo aser Gaza nung kiojen shilem 35 shibo raksaba satellite noksa ajanga jangjaogo.

Meimchir temeden atema inyaktertemia Gaza kübok district aika nung ayawara sangdongogo. Gaza nung chiyungtsü peria machiba agi tanur aser tetsütem aika asüba osang jangjaogo.

Gaza nung tetsür-tanur densema nisung meyirjang

# ANOGO ABEN TSÜNGREM DEN

## Temeshi Rasaba

T.Ken 58:1-11

Tanü Tsüngremer nüburtemi temeshi rasaba sayutsü nüngdaker. Sensakertem ajemrepba aser politician-temi ozüng raksaba asenoki kodanga pelaseta magizüker. Tsüngremi temaba menden nung amenertemi parnok asoshi dang tashi amshibaji maginer. Shidakba yimsüsürtemi parnok tashiji nübur aser par linük yanglutsü amshir. Dawidi iba ken pa temeshi tejashiba agi zülu. Pa jashia mali asü saka temulung ayanga iba ken zülu.

Dawidi yimsüsür temenen anema jembia (t. 1-5). Parnok o temeshi masü, aser parnoki ochi o bendang magütsü (Yob 31:6). Parnok tekai seret shidak mamshir, kechiaser parnok temulungjang tamajung liasü. Dawid parnok per ka den atishia jembia (t. 4). Dawidi tanishirtemi o bendang (t. 6-9). Tanishirtem asoshi obendangba arutsü noksa terok agütsü: 1) tebu maket molusongzü (t.6) Kenü Tsüngremi tebu atsüdoktsüsü aser parnok Tekümzüker malitsü; (2) ali nung tzü remadokba (t.7)-tsükla sülen, tsünglu malur aser ali telungi luadoker; (3) teraksa lijakjang (t.7)Tsüngremi parnok akhümdong ajak agentsü; (4) yimsaa aoba küpra (t.8) tamajunger parnok sasa tali aodang yimsaadoktsü; (5) tasü asoba nu (t.8) parnoki timtem aika ajurutsü aser asütsü; aser (6) chipo mopungi oner aoba (t.9) parnok sentong tatem matemtsü, aser parnoki Tsüngrem terasabai raksatsüsü.

Dawidi pai Tsüngrem tushiba metetdaksü (t. 10,11). Asenoki asen sasa mang mayanger, saka tamajunger Tsüngremi ochi o bendang nung pelar (J.Adok 18,19). Pai pa tsükchirtem madak noktaksü. Kenü temeshipuri Tsüngremi takok anguba nung pelateptsü. Alima o bendangtsü pai aremzüka atar. Kodang ibaji atalokdir Tsüngremi tim bendangtsü, aser Yisu sentsüwangshitsü.

Tashi mejungi amshibaji tejen tebilemetsü lir. Shirnoki pei tashi mejungi amshir parnok dangi kechi arutsü Laishibai ashir. Tsüngremer nüburtemi parnok temeshi terasaba sadoka ashitsü, kechiaser kenü tamajunger o bendangtsü ta asenoki metet. Pa takokba nung aser temeten nung aruba asoshi Pa tenüng tushiang.

aikati chiyungtsü, tzü temerük aikati arendaka bilemetsür. aser mozü kanga nüngdaker. Gaza nung rara metenzükdanga aikati toktsür ao. 2007 küm Christian bookstore manager ka tepsetba densema Gaza nung Khristantem anema inyakba kanga bulua akümba mapang nungi tenzüka Khristantemi Gaza toktsür ao.

Tesüiba küm 20 tsüngda Hamas aser Israel na tsüngda maneni raraba, Israel-i Gaza mokdangba aser Palestine nung yimtenren tensa tamajungba akümba kulitem ajanga-a Khristantemi Gaza toktsür ao.

Gaza nung Khristantem joko küm 2,000 jungnüa alir, ajisüaka tensa yamai dang ora Gaza nung Khristantem ka danga manüngtsü südi, ta aikati bilemer.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Sügnük**

(n) süng asudang aser alepdang süng tanüktari aluba (small bits of wood)

\* Mi apudet dang sügnük nungdaker.

**Süngo**

(n) süngdonglidong nungi adokba tu (leaves)

\* Tang mapang ya süngdong nung süngo lanu meyiba mapang lir.

**OLONG PAITEP # 6779**

15x15 crossword grid with numbers 1-17 indicating starting points for clues.

**TIPIEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_ \_ \_ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzüba - (5)

**OLONG PAITEP # 6778 TELANGZÜBA**

**TIPIEN :**

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo, 14. Alia,
- 16. Angati, 17. Odi, 18. Azü,
- 19. Sünglang.

**LANGTSÜNGLEN :**

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

**NAI-A YA METETTER MA**

**ALIMA NUNG NISUNG TIMTIBAI JEMBIBA OSHI 10:**

- 1. English : 1.42 billion
- 2. Mandarin Chinese : 1.38 billion
- 3. Hindi : 662 million
- 4. Spanish : 559 million
- 5. French : 309 million
- 6. Arabic : 274 million
- 7. Bengali : 272 million
- 8. Portuguese : 263 million
- 9. Russian : 245 million
- 10. Urdu : 231 million.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**ZORO-i India & Myanmar na arrtsü nung rally ka ayongzükogo**

Aizawl, Monupii/May 6 (Agencies): Mizoram nung Zo Re-Unification Organisation (ZORO)-i March 16 nü India aser Myanmar na arrtsü nung rally ka ayongzüka agitsü sentong aliba sangdongogo.

Centre sorkari tawa Northeast nung India aser Myanmar na tsünga arrtsü nung atsü atsüa Free Movement Regime (FMR) agintsü telemteba agiba anema iba rally ayongzükogo

Mizoram yimtiba Aizawl kübok Treasury Square nung amenoka aliba ZORO headquarters nung senden ka amenba sülen iba telemteba agia liasü.

Iba senden ya ZORO tir R Sangkawia lenisüba nung agia liasü.

Senden nung, India aser Myanmar arrtsü nung atsü atsüba ajanga tetsüdaksü



adoktsü ana nung aliba indang tongtibangsa sensaksema liasü.

Züngsemtemi, FMR aginba anema ola adokogo aser ashiba agi, iba ya telongjem asoshi masü saka lemdangtsütsü asoshi jenjang ka agiba lir aser iba yagi Zo nung tali tajemba kümdaktsütsü.

Parnoki, iba telemteba agiba anema nokdakba lemsatepogo aser Myanmar den arrtsü nung rally ka ayongzüka agitsü sentong aliba sangdongogo.

Maneni ZORO-i, Mizo

nunger ajak aser Myanmar nungia nüburtem dang iba rally nung shilem agitsü ayongzükogo.

Parnokisa, Myanmar arrtsü nung aliba India nung yimtsüngtem nung alirtem dang iba longkak aiba sentong nung shilem agitsü mepeshia metetdaksüogo.

February ita Aizawl yimti kübok Vanapa Hall kima NGO Coordination Committee (NGOCC)-i ayongzüka longkak aitba sentong ka agiba sülen tang iba osang sangdongogo. NGOCC nung ya NGO tongtibang pongu densema lir aser parnoki FMR aginba anema longkak aita liasü.

Longka aitba mapang wadang balala nungi nüburtem aika adenshia placards tem nung 'onoki arrtsü nung atsü maginer' ta zülua bener yimyim ayima longkak aita liasü.

**Manipur nung aluyimer ka tsüngi-i aiset**

Imphal, Monupii/May 6 (Agencies): Deobarnü Manipur nung tsüngi agi aiba sülen arishi küm 45 tain aluyimer ka asü, aser pa kinungtsü den tangar ka kanga mejungi yirua liasü.

Ketdangsurtemi Hombarnü ashiba agi, asüsang ya Huidrom Nilakanta (45) ta jangjaogo. Pa ya aluyimer ka aser Kakching, Manipur kübok Yangdong Awang Leikai nung alir ka liasü.

Deobarnü 1:30 ako shi nung par tzülü nung mapa inyaka aliba

mapang tsüngi agi aiba sülen pa iba tesem nung süatok.

Pa kinungtsü Romila (40) shiba la kinungbo den külemi alu inyaka liasü labo teiyur dang yirua liasü.

Kasa tatalokba ka nung ano tanga aluyimer ka tenüng agi Lourebam Basant Singh (53)-a tsüngi agi kanga mejungi yiruja liasü. Pa ya Bishnupur district kübok Lourebam Maning Leikaiunder nung alir.

Pa par tzülü nung mapa inyaka aliba mapang Deobarnü 4 ako shi nung tsüngi agi ia liasü.

Temetetsü kaji April 11 nüa arishi küm 11 tain tebur chanu ka tenüng agi Telem Suraj, Imphal west district nung Lamphel police station kübok Agriculture Quarters nung tsüngi iseta asü. Pa par kinunger ka kidang asaya aliba mapang tsüngi agi iset, ta police-i ashi.

Tanobusang ya Regional Institute of Medical Sciences (RIMS) Imphal anasa Agriculture Quarters temeket nung asaya aliba mapang tsüngi agi ia liasü.

**Manipur nung camp tazüng ana nungi prangbong injang ngutetogo**



Imphal, Monupii/May 6 (Agencies): Manipur nung Churachandpur district den atonga aliba Bishnupur district kübok Aimol aser Irengbam Maning yimtsüng temeket nung prangbong injang aser bomb tem aika ngutetogo, ta ketdangsurtemi Hombarnü metetdaksü.

Itangitertem osang dak ajemdaker Deobar anepdang Nambol police station kübok

state aser centre force temi tesem kar meita aoba mapang camp tem nguteta liasü, ta ketdangsurtemi metetdaksü.

Sepaitemi carbine ka den magazine ana, 9mm pistol ka den Magazine ka, 36 HE grenades pezü, injang 50, improvised explosive device (IED) indang PEK sticks pongu koba gram 750 shi liasü, SLR tube launchers trok, detonator 75, 36 hand grenade arming

rings ti, ballistic cartridge ana, tear shell ka, C90 MK 3 grenade ka, 80 grenade MK-1 (WP) ana, Bicard Strip ka, walkie-talkie ana den charger ka ngutetogo.

Ken o maneni bushisüngdangtsü atema sepaitem ngutetba prangbong injang, bomb aser hadir balala ya Nambol police station nem bendanga agütsüogo, ta kasa sangdong ajanga metetdaksü.

**OFFICE OF THE  
MERANGKONG SENSO MUNGDAŃG**  
P.O. TULI - 798618  
DIST. MOKOKCHUNG : NAGALAND.

**TENÜNGSANG AGÜTSÜR**

Merangkong Senso Mungdang ajanga asen sensosangertem nem takok aser konang bener arutsüba asoshi nenok nem tenüngsang agütsür.

 <b>HSLC</b> <b>Benjungakum Jamir</b> F/N - Meyitangit M/N - Moanaro Top: 9 (c) (96.83%) Don Bosco School Tuli	 <b>HSLC</b> <b>N.Tiarenla Longkumer</b> F/N - Moanungba Longkumer M/N - Imlikumla Top: 14(c) (96%) St John's Higher Sec School Kohima	 <b>HSLC</b> <b>Imkongsungit Jamir</b> F/N - I.Korachiba Jamir M/N - P. Imtikala Top: 17(c) (95.67%) Fernwood School, Kohima	 <b>ICFAI University Nagaland</b> <b>Imnasungit</b> F/N - Lt Bendangkokba M/N - Wt Lolenyangla Gold Medal Bachelor of Computer Application Academic year 2020-2023
--	---	---	---

Ano shirnoki-sa takok tajung nguoko nenok ajak dang kanga pelar aser tenüngsang agütsür. Tsüngremi nenok nem sempet tajung, shisatsü aser arishi maneni moajangma.

<b>Sd/-</b> <b>IMLITIBA IMSONG</b> <b>President</b> <b>Merangkong Senso Mungdang</b>	<b>Sd/-</b> <b>TAKOMANGYANG</b> <b>General Secretary</b> <b>Merangkong Senso Mungdang</b>
---	--

**OFFICE OF THE  
MERANGKONG SENSO MUNGDAŃG**  
P.O. TULI - 798618  
DIST. MOKOKCHUNG : NAGALAND.

**TENÜNGSANG AGÜTSÜR**

Merangkong Senso Mungdang ajanga Wb.Marsanen Imsong, asür Wb. Yaongnok Imsong aser asür Wt. Tongpangkoka na jabaso nem Ao Senden Tir asütsü maongka agütsü nung Aoli sanger dang kanga pelaba sangdonger. Tulusang Tsüngrem-i pa aser par kibong maneni len ania moajangma.



<b>Sd/-</b> <b>IMLITIBA IMSONG</b> <b>President</b> <b>Merangkong Senso Mungdang</b>	<b>Sd/-</b> <b>TAKOMANGYANG</b> <b>General Secretary</b> <b>Merangkong Senso Mungdang</b>
---	--

### Panama tir election nung José Raúl Mulino-i takok nguogo

**Panama City, Monupii/May 06 (Agencies):** Panama nung aliba nüburtemi par tir asütsü atema taoba mapang security minister inyaka alisang José Raúl Mulino shimogo.

Senotsü ochimashi amshiba ken o nung Mulino indang running mate Ricardo Martinelli disqualify sütsüba sülen pa tir menden atema toktep tenzük.

Arishi küm 64 tain Mulino-i nübuyimba mapang Darién Gap shibangtsütsü nangzük. Darién Gap ya arem min ka lir aser küm shia migrants meyrirjang aikati iba arem ajanga senzür.

Pai takok akungba sülen pa shinga nema manishidaksür ta ashi.

Pa ya mezüngbo tatong tir atema toktepa liasü aser tatemlen tir menden asoshi toktep aser television nung sayuba presidential debates kata nunga shilem magi, aser opinion polls nungbo conservative nungi Murillo-i takok angutsü amai sayua liasü.

Vote shilem 90 dak tali azüngdang Mulino-i vote shilem 34 ngur liasü, aser pa sülen anti-corruption candidate Ricardo Lombana-i shilem 25 jungnüa ngur liasü. Lombana-ia pai tamakok anguba lemsatepogo.

Taoba tir Martín Torrijos-i vote shilem 16 aser lawyer Rómulo Roux-i shilem 11 ngua liasü. Tanüngba candidate pezü yagi vote shilem 10 dang tajemba ngutet.

Ricardo Martinelli ya 2009 nungi 2014 tashi tir inyakba mapang ajangshiba nung ajemdaker Mulino-i linük indang rongsenketzüng shia arudaksütsü teimla nung nüburtemi pa nem vote agütsü.

Deobarnü vote azüngba nung pai akoktsü ta jangjatetba sülen Mulino-i pa bhukumertem dang "Nükjidong tongogo, Ricardo" ta shia liasü.

Saka pai Martinelli den tesendaktep kecha mali ta nüburtem nem angatetdaksütsü meranga pa shinga indang

Office of the  
**Satsü Village Council**  
Mokokchung, Nagaland

**JANGJASHIA METETDAKTSÜR**

Tir Yimyim adok 5th May, 2024 aser Ao Milen adok 6th May, 2024 nü osang agütsüba, koba 3rd May, 2024 anogo Kinunger yimdak kirung lendong dak sendakba nung temulung melemtetba nisung ka Mokokchung Police-i puogo, ta agütsüba adoka lir. Iba adoka aliba nung Additional Superintendent of Police Mokokchung ajanga Kinunger Yimdak Kirung lendong dak sentakba nung ajemdaker temulung melemtetba nisung ka SATSÜ yim lushi nung puogo ta adokdaksü.

Agüja aliba osang kakettem nung koba osang adoka lir, iba dak sentakba nung SATSÜ yim council ajanga yamai jangjashia metetdaksür.

Kinunger yimtak Kirung lendong dak sendakba nung ajemdaker temulung melemtetba nisung shinga SATSÜ yim lushi nungi pua mali ta jangjashitsür.

Iba den osang tejangja makai SATSÜ yim tenüng menükja osang zülura mesüra adoktsüra tarutsü nungbo SATSÜ yim council ajanga tasüngdangba alitsü ta metetdaksür.

**Sd/-**  
**Longri Imchen**  
**Secretary**  
**Satsü Village Council**

### Israel-i Rafah nungi nüburtem ainshitsü totuyuba agütsü

**Tel Aviv, Monupii/May 06 (Agencies):** Israel army temi Gaza south tsütsü Rafah yimti amaktsü mapang talangka nungi amokmerena aruba asangsang akumtsü amai ajiteter, kechiaser parnok yangji aliba Palestine nungertem ainshitsü totuyuba agütsüogo.

Hombarnü Israel sepaitemi Rafah nung aliba nüburtem dang "expanded humanitarian area" kati ainshitsü ashi. Rafah nungya Gaza Strip tesem balala nungi Palestine nungertem jenoka alir. Rara anena atatsü asoshi jembishinüba nung tamakok aluba atema Israel aser Hamas tsüngta kati ka dak tai tongloksütepba mapang ka nung iba osang ya arur.

Israel mitkari social media alirtem al-Mawasi refugee camp nung tesem kati aotsü ajungshia liasü, koba Khan Younis anüolen Mediterranean anasa lir.

Khen atema ainshia atatsü osang ya Arabic oshi nung flyers, SMS messages, phone calls aser media broadcasts ajanga sangdongtsü ta army temi ashir.

"Hamas teloki pua alirtem kidangi meyipa meshilang tashi Israel sepaitemi Gaza tesem ajungalen Hamas maneni bushitsü," ta ashi.

Social media X nung Israel army odongtar Avichay Adraee-i ashiba agi, iba tayongzükba ya ash-Shoka kübok as-Salam, Janina, Tabet Ziraa aser al-Byouk tesem nung alirtem ajunga asoshi lir.

Israel mitkar odongtar katia nisung 100,000 shi item tesemtem nungi anienogo, ta osangbener tem dang ashi.

Israel-i iba tesem nungi ainshitsü totuyuba agütsüba aser iba tesem amaktsü imla aliba ya lendong aketba mera ka lir, kong timtem takoksa jenti alitsü, ta Hamas ketdangsür

<b>ALI TAYOKTSÜ LIR</b>	<b>NAGA UNITED</b> 5160. Sq. Feet - 91 x 60 Contact No. 9402988921
-------------------------	--

### Chad nung mitkari yimsü asüba anentsü tir election agir

**N'Djamena, Monupii/May 06 (Agencies):** Africa nung mitkar yimsüsüba kübok aliba linüktem rongnung democratic yimya nung yimsü asüba linük mezüngbuba Chad ya akumtsü atema Hombarnü vote agitar.

Iba election ya ajanga ajungbena lenir Idriss Déby Itno asüba sülen küm asem atema transition benoka aliba tembangtsü.

Ajisüaka par jabaso Gen Mahamat Déby yagi takok angutsü amai ajiteter, anungji pa ajanga temelenshi kangabo marutsü südi ta nüburtemi temulung melemtetba.

Déby ama tir atema tokteper nisung toku rongnung Ato Kilonser Succès Masra ya tesashiba lir.

Tesem kar nung ghonda ka shi agi menur voting tenzükogo.

Tir Déby-i linük yimtiba N'Djamena nung pa indang vote agüja liasü.

Constitutional order tanaben meyipa shilangtsü atema pai nangzükba ama election agütsü anogo lateta aliba mapang election agitetba atema tejak tenteter, ta pai shia liasü.

"Ajaki vote agüja tir shimtsü Chad nüburtem dak keta lir," ta pai ashi. "Temelenshi aginer ta sayur temi oa yimjung nung vote agütsüsüla," ta pai pa indang

vote agütsüba sülen ashi.

Ano yimten yimsüsür nisung ter tokteptsü teimla aliba rongnung tejangja nübu ana, Nassour Ibrahim Neguy Koursami aser Rakhis Ahmat Saleh na constitutional council ajanga shilem magidaksü, kechiaser parnok anema ken o balala benoka lir.

Ajisüaka nisung kar nem tenokdangba agütsüba ya yimtenren tsütsü mera kar agiba lir ta kari ashir.

Ano Déby den tokteptsü teimla alir Yaya Dillo ya linük yimtuba N'Djamena nung February ita pai anir National Security Agency amakdang security forces-i tepset.

Déby yimsüsüba nung democratic tashi agütsütsü atema tasa ka lir ta activist temi sangdonga election nung shilem magütsü ayongzükba liasü.

2022 küm October ita longkak aitba sülen opponents tem pua merenshiba aser tepsetba ajanga nisung aika linük balala nung jenoka lir.

Ajisüaka West aser Central Africa nung aliba linüktem nung Chad election ya alizüng ka alitsü, kong 2020 küm nungi tenzükba linük aika mitkar yimsüsüba küboki aita lir.

*(Maneni tapak 8 nung...)*

# NA-i ayongzüka World Kid's Athletics anogomung amungtsü

**Dimapur, Monupii/May 6 (TYO):** Alima ajunga den jangyumedema Nagaland Athletics-i ayongzüka May 7 nü Nagaland kübok district balala nung World Kid's Athletics anogomung amungtsü. Iba anogomung ya "World Mile Challenge" ome nung ajemdaker amungtsü.

Kid's athletics anogomung ya tanurtem aser lanurtem nem temang anema alitsü aser parnok asaya nung shilem agitsü atema ajungshitsü nükjidong nung alima ajunga nung amunger. Iba ya alima nung grassroots sentong tulutiba rongnung ka lir. Taküm Kid's Athletics

anogomung ya Dimapur, Kohima, Mokochung aser Peren nung district athletics association temi ayongzüka amungtsü. Tanur arishi küm 4 nungi 14 tsüingda alir shirnoki iba sentong nung shilem agitsü janrar, parnoki pei district association tem den tongteprateptetsü.

# India tetsür aser tebur 4x400m relay team Paris Olympics atema qualify süogo

**Monupii/May 6, 2024 (Agencies):** Hombarnü Nassau (Bahamas) nung World Athletics Relays asayaba mapang tanabuba round heat nung tanabuba jenjang nung tembangba sülen India tetsür aser tebur 4x400m relay team Paris Olympics atema qualify süogo.

Tanabuba round nung heat asemprongla nung temaba jenjang nung tembangba team anana Olympics atema qualify süogo, koba July 26 nungi August 11 tashi asayatsü. Tetsür 4x400m team team Olympics atema qualify asütsü kangabo mimlai liasü aser ajakai India tebur team dak rangloker liasü, shirnoki Tokyo Olympics aser 2023 World Championships nung Asian record ajatetogo aser parnoki 2023 Asian Games nunga gold medal nguogo.

Ramesh melena Arokia Rajiv team-i ait aser pa Anas aser Ajmal na sülen tasembuba leg asema liasü. Indian tebur 4x400m team tasembuba jenjang nung liasü, saka anchor-leg runner Jacob-i Arokia ket nungi baton agizükba sülen pai kanga junga asem aser Mexico nunger asayar ajateta tanabuba jenjang nung tembangba liasü.

Tetsür tetoktepba nung Rupal Chaudhary, M R Poovamma, Jyothika Sri Dandi aser Subha Venkatesan nungeri alizüing minute 3 second 29.35 nung tongteta parnok Jamaica (3:28.54) sülen tanabuba jenjang nung tembangba aser Paris Games atema qualify süogo.

India tetsürtem Deobarnü mezüingbuba round qualifying heat nung pongububa nung tembangba liasü. Parnoki alizüing minute 3, second 29.74 nung tongteta liasü.

Kasa mapang nung India mixed 4x400m relay team second round heat races nung shilem magi, kechiyong Ramesh Deobarnü tebur 4x400m mezüingbuba round heat asemba mapang molatsü atua liasü.

Iba sülen tebur team nung Muhammed Anas Yahiya, Muhammed Ajmal, Arokia Rajiv aser Amoj Jacob nungeria alizüing minute 3 second 3.23 nung tongtet aser parnok indang heat nung parnok USA (2:59.95) sülen tanabuba jenjang nung tembangba liasü.

Tebur team first-round qualifying heat nung tembangba masemtet, kechiyong second leg runner Rajesh Ramesh molatsü atuba ajanga tasemdak nung anena liasü. Iba sülen

Ramesh Deobarnü mixed 4x400m aser tebur 4x400m asemtepba nung asemogo. India team Tokyo Olympics nung mixed 4x400m relay nung asemogo. Iba asaya ya Tokyo nung mezüingbuba asaya liasü.

# Andrey Rublev-i Madrid Open tebur kija asaya kokogo



**Monupii/May 6, 2024 (Agencies):** Deobarnü Madrid Open tebur kija final asaya kanga toktepba asayaba sülen Andrey Rublev-i 4-6, 7-5, 7-5 agi Felix Auger-Aliassime koka taküm tanabuba asayamung kokogo.

pa set ka nung dang tamakok ngua liasü. Kasa mapang nung Auger-Aliassime, semi-final nung Jiri Lehecka yirur masayateti akümba aser quarterfinal nung Jannik Sinner yiruba ajanga masayatetba sülen final tonga liasü.

Rublev indang serve break süa pa 4-1 agi tejakdang aküm aser asaya koka liasü. Tanabuba set nung asayar anapronglai pei serve break mesüidaksüi game 12buba tashi asaya atuba sülen Rublev-i set point ana angu aser tanabuba kokteta asaya akok.

Iba asayamung nung shilem magi tsüingda Rublev asaya pezü tashi atonga tamakok ngur liasü, saka final asaya nung pai set ka mekoki aliba nungi tur Canada nunger asayar ya kokogo. Arishi küm 26 tain asayar yagi January ita Hong Kong Open akok, ajisiüaka iba sülen junga masayateti aru aser tang Madrid nung kanga junga asayaogo. Iba asayamung nung

Ajisüaka arishi küm 23 tain Canada nunger asayar yagi final nung pai akokba tashi tajungtiba asayaogo, koba pa atema mezüingbuba Masters 1000 final liasü. Final asaya Auger-Aliassime-i kanga junga asaya tenzüik aser mezüingbuba aser pongububa game nung pai

Tasembuba aser deciding set asayaba mapang Rublev-i game tanabuba aser pezübuba nung serve break asütsü maongka angu saka magitet. Ajisiüaka game 12buba asayaba mapang Auger-Aliassime-i double-fault ka menaba sülen Rublev nem asaya kokdakja liasü.

# St. Luke School, Longmatra asayamung takok ngua agiogo

**Dimapur, Monupii/May 6 (TYO):** St. Luke School, Longmatra annual games & sports, Public Ground, Longmatra, Kiphire nung May 3 aser 4 nü takok ngua asayaogo. Iba sentong nung EAC Longmatra, Takatemjen Pongen alakteta jaoker liasü.

angutsüba mesüra points angütsüba atema dang masü saka iba ya tanüla tajung nung tembanga tokteptsü atema lir, ta ashi. Maneni pai, kaketshirtem dang asaya ajanga koda temelenshi bener arutsü iba indang bilemtettsü ajungshia liasü.

Sentong nung o jembiba mapang EAC-i, asaya ya pei dak aketba asayaba yimya sayutsü atema dang masü saka teamwork sayutsü, bendanga agüja asayar yimya tajung benshia asayatsü asoshi lir, ta ashi. Paisa, asaya ya medal

Iba sentong nung Vice Principal, LHSS, Rev. Father Marius Patton, Village Council züingsemtem, Dobashi tem, Gaon bura tem, tsürapurtem aser tejangrartemi shilem agia liasü.

## BENDANGLI OSANG : Tapak 7 nungi...

### Chad nung mitkari yimsü asüba...

Nisung million 18 jungnüa aliba totzü adokba lima nungya 1960 küm France nungi nüjiso anguba sülen yimten tashi melentepba nung tim mapa inyaka mali. 1990 küm Idriss Déby-i Hissène Habré atsüingdok aser küm 30 tashi yimsü süa arur arishi küm 68 nung April 2021 küm tongpang nung asü.

Iba sülen tang arishi küm 40 junger aliba par jabaso-i tebu melenzük aser ita 18 atema dang lenir inyaksü ta nangzük saka mapang tatsüka atsülanga liasü. Iba election results ya May 21 nung sangdongtsü imlar aser candidate katia vote shilem 50 dak tema mongutetra round tanabuba ya June ita agitsü akok

### Israel-i Rafah nungi nüburttem ainshitsü...

UN Agency for Palestine Refugees (UNRWA) ajanga social media post ka nung Israel-i iba yimti amakba ajanga Palestine nunger timtemer aser asü-amar tali akumtsü ta ashir, kong taoba küm October ita nungi rara arudang nisung 34,000 dak tema tepsetogo. Iba yimti nung Israel-i bomb pokloktsüba mapang tila-tanur ti densema nisung 22 tepsetba sülen nüburttem ainshitsü totuyuba ya agitsü. Israel Defence Minister Yoav Gallant-i sangdong ka nung ashiba agi, Gaza nung khen atema rara anena atatsü ken o benokba nung Hamas-i memulungba ajanga Rafah nung military operation agitsü nüngdaka akum. Iba ken o nung pua aliba Israel nunger kar chioktsü dena liasü.

agiaka yangji Gaza Strip nung teti asoshi rara tembangba dendaktsüsüla ta Hamas telok nungi ken o jembirtemi nokdaker. Israel-i iba tesem rangben nung ceasefire alitsü memulunger aser tepuokdak alirtem melenteptsü atema rara khen anena atatsü ashir. October 7 nü Hamas teloki Israel nunger pua bener aor nisung 130 shi anünga aliba chioktsü atema lenla balala nungi Netanyahu dang kanga ajungshir. Ajisiüaka ano hardline coalition partners temi maneni raratsü nungshir. Hombarnep osangbener den jembidang, Rafah nung operation agitsü sentong aliba ya tatakzük ka atema dang, ta Israel Defense Forces (IDF) odongtar Lt Col Nadav Shoshani-i shia liasü.

Tang tesüsa Cairo nung jembishinüba nung tangatettep kati marutetba sülen telok nungi ken o jembirtem shisa agiteptsü atema Doha-i ogo, ta Hamas ketdangsür kati ashi. Ato Kilonser Sheikh Mohammed bin Abdulrahman bin Jassim Al Thani den iba ken o jembitsü asoshi CIA director Bill Burns Hombarnü Qatar-i arutsü imlar, ta osang kar ajanga ashir. Kechi tezüingzüktep agidir

Mapang telatet ka sangdonga mali aser meilongi nisung 100,000 shi iba tesem nungi anizüker aotsü, ta pai ashi. Cairo nung Hamas aser Israel tsüingta ken o jembishinüba nung telemtetba tajung karbo agitsü südi ta Palestine nungertem anogo ishika teimla nung liasü. Ajisiüaka Hamas aser Israel tsüingta lenji marutetba onük kar aliba sülen teimla samaa akum.

**BILEMDANGANG**  
"Tesülen repranga tejakleni aotsü tamakoktsü."